



11. april 2019

UPA 2018/65-171
Aqqalu C. Jeremiassen

Provstudvalgip atorunnaarsinneqarsimanerata nalilersueqqittoqarnissaanik UKA2019-imut piunasaqaat. Nalilersuinerup imarissavaa provstudvalgip atorunnaarsinneqarnerani sunniutit suut uuttuuttigineqarsimanersut neriutillu suut eqquussimannginersut. Nalilersuinerup naggataarutaasumik imarissavaa provstudvalgip atulereqqinneqarnissaanut suut innersuussutaassanersut Naalakkersuisut peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortaq Jens Napâtôk', Partii Naleraq)

Ilagiit naalagaaffiup tapersersugaasa avataatigut upperisaqaqatigiit allat pillugit inatsisissaq pillugu danskit Naalagaaffiup oqartussaataannut Naalakkersuisut saaffigineqqullugit peqquneqarnissaat siunertaralugu Inatsisartut aalajangiiffigisassaattut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Inuk anersaamigut kiffaangissuseqartuartariaqarpoq periarfissaqarlualunilu. Atassummiillu siunertariuarparput inuk anersaakkut nukittulluni imminullu napatissinnaassusilik. Taamaammallu upperisaqarnikkut ilageeqarnikkullu inuiaqatigiinni pisariaqartitaq malillugu suliniutaasinnaasut tapersersorusuppagut.

Provstudvalgeqaleqqinnissaa pillugu nalilersueqqinnissamat siunnersuummut tunngatillugu ilagiit, allallu susasaqartut paasilluaqqaarumallugit, qanorlu pisariaqartitsineq qanorlu iluaqutaasinnaanera qulakkeerluarumallugu ataatsimiititaliamut innersuukkusupparput.

Nunatsinni pisortatigoortumik upperisaqarneq Atassummiit tapersersorparput. Allaniillu upperisanik toqqaasimagaanni soorunalimi kiffaangissuseqarpugut aamma pinsinnaatitaaffeqarpugut. Atassummiillu upperilluinnarparput kiffaangissuseq aamma akisussaaffimmik malitseqartoq. Assersuutigerusupparpullu meeqqat atuarfiat tamanut immikkut akeqanngitsoq, privatskole-llu immikkut akillit. Angajoqqaat kiffaangissusertik atorlugu nammineerlutik toqqarsinnaavaat meerartik sumiitissanerlugu.

Immikkut ittunik toqqaasinnaassuseqarnerput tunngavigalugu, inatsiserparujussuarnillu nutaanik pituttorpallaarnissaq apeqquserlugu imm.171 Atassummiit itigartipparput.